

李文忠公奏稿

李文忠公奏稿

卷之四十目錄

出洋肄業在事各員奏獎摺 光緒七年正月十九日

淮軍軍需報銷摺 光緒七年正月十九日

軍需交涉洋務片 光緒七年正月十九日

挑濬大清滹沱兩河下尾摺 光緒七年正月十九日

答覆朝鮮所問事宜摺 光緒七年二月初二日  
附清單

唐仁廉不能赴吉摺 光緒七年二月初六日

查覆招商局參案摺 光緒七年二月十一日

東海關京餉分年核議摺 光緒七年二月二十五日

東明仍請改娶缺摺 光緒七年二月二十五日

瀝陳感悚下忱摺 光緒七年三月初四日

會國荃乞假南歸片

光緒七年三月初四日

顛懇叩謁

梓宮摺

光緒七年三月十三日

請撥鄂漕摺

光緒七年三月十八日

請補造剝船二百隻片

光緒七年四月二十三日

資遣湘毅軍片

光緒七年四月二十三日

截留礮位解奉省片

光緒七年四月二十三日

直境開辦礦務摺

光緒七年四月二十三日

請減出口煤稅片

光緒七年四月二十三日

請開平泉銅礦片

光緒七年四月二十三日

吳仲翔辦理學堂片

光緒七年四月二十三日

滿三德請加副將銜片

光緒七年四月二十三日

請緩蘆課奏銷摺

光緒七年四月二十三日

營口練軍費成關道摺

光緒七年四月二十七日

鐵甲營款分別續造摺

光緒七年四月二十七日

商局官款撥購鐵甲請緩撥還片

光緒七年四月二十七日

李文忠公奏稿卷四十

全集一之四十

桐城吳汝綸編錄

出洋肄業在事各員奏獎摺

光緒七年正月十九日

奏爲前派船政生徒出洋肄業在事華洋各員始終勤奮擬懇天恩給獎以示鼓勵恭摺仰祈

聖鑒事竊臣等接准出使德國大臣兼肄業監督李鳳苞咨開前因福建船政選派駕駛製造生徒出洋肄業經該大臣偕同洋監督日意格隨員馬建忠文案陳季同繙譯羅豐祿等於光緒三年三月內到洋督率肄業三年陸續學成咨送回華其展限補習四月者扣至六年八月亦一律完畢分別留洋遣回在案溯查出洋生徒在船時各限功課不合開曠既抵英法專延洋師補教以充根柢一面偕同洋監督面商英法部臣將在英之駕駛生先派三

生登鐵甲船九生入格令尼次官學續將官學八生調入鐵甲船  
學習歷赴地中海大西洋美利堅阿非利加印度洋等處學習操  
防排布迎禦之法迨離船後又專延教習補授電氣鎗礮水雷各  
法俱有船主憑單給執並照章酌量游歷工廠以廣見識是駕馭  
諸生在船學習不止原定章程分班五、六人上鐵甲船已也其在  
法之製造生先送四生入削浦官學五生入多廊官廠其餘派入  
汕答佃官礦學及科魯蘇民廠分習開采烹煉鑄等事旋經商  
明部臣將汕答佃等處五生入巴黎官礦學其製造藝徒初派民  
廠補習工藝續經分送賽隆及白海士登官藝學該生徒等各照  
官學定章經專門洋師按年甄別給執官憑並酌量游歷英法比  
德各國新式機器船械各廠以資考訂凡可傳習各生徒俱已竟  
功雖天資不一造就有深淺之殊而按章督課實與諸官學卒業

之洋員無所軒輊其製造者能放手造作新式船機及應需之物  
駕駛者能管駕鐵甲兵船調度布陣加之歷練應可不藉洋人其  
製造如魏瀚陳兆翱鄭清濂林怡游開采銘煉如羅臻祿林慶昇  
駕駛如劉步蟾林泰曾蔣超英方伯謙薩鎮冰頗爲優異其餘加  
以陶鎔均可成器皆有考取確據委與原定章程辦有成效之語  
日符苟非在事各員指臂相資未克臻此所有出力各員除正一  
品銜前船政監督日意格屢稱渥荷

隆恩不敢再邀獎敘及隨員候選道馬建忠業經

奏獎襄辦文案縣丞錢德培不及三年存記勞績外其文案陳季  
同緝譯羅豐祿出使德國二等參贊官徐建寅幫辦監督洋員斯  
恭塞格洋文案高氏耶等五員辦理文案緝譯襄助華洋監督移  
調生徒料簡妥協及偕同前赴各廠考求機器製造采煉並查察

功課兼習律例公法化學政治等事均能始終勤奮辦理有成應請照案

奏獎等因前來臣等伏查船政生徒派往英法各國肄業分入官學官廠於製造駕駛各事均有心得該監督等周歷查察調護維持實心實力使諸生學業進益已多而隨員等兼習各學疊經考試取中奔走照料亦著勤勞該生徒等既經學成回華自應照案給獎以示鼓勵此次出力之監督二品頂戴三品卿銜記名海關道李鳳苞擬請

賞戴花翎留閩補用都司陳季同擬請免補本班以遊擊仍留原省補用並

賞加副將銜候選主事羅豐祿擬請以同知不論雙單月歸部選用並



賞加四品銜候選道徐建寅擬請

賞加三品銜至三品銜一等寶星前福建船政副監督洋員斯恭  
塞格擬請

賞給總兵銜洋員高氏耶擬請

賞給三等寶星並加四品軍功俾資觀感而策後效所有帶領船  
政生徒出洋肄業在事華洋各員始終勤奮擬請獎勵緣由謹合  
詞恭摺具陳伏乞

皇太后

皇上聖鑒訓示謹

奏

淮軍軍需報銷摺

光緒七年正月十九日

奏爲淮勇軍需自光緒五年正月起到十二月底止收支款目造冊報銷恭摺仰祈

聖鑒事竊照淮勇軍需前截至光緒四年十二月底止業經列爲第七案報銷於光緒六年七月十四日具

奏奉

旨該部知道單片併發欽此伏查光緒五年分淮軍除先後抽裁及遣撤全營外分防直隸保定天津海口並各臺局護運糧餉軍械共計二十七營又提督劉盛休所部銘字馬步十三營駐紮山東張秋鎮一帶又福建陸路提督唐定奎統領銘武步隊十營與調補廣東水師提督吳長慶所統慶字親兵六營分防江蘇沿江南北兩岸礮臺並吳淞海口之武毅右軍五營徐宿馬隊五營共

計二十六營統歸淮勇軍需案內彙冊請銷所有營哨官弁員名  
勇夫開收總數征防處所先經造冊分咨軍機處戶兵部備查其  
應需薪費口糧正雜各款並柴薪斤重價值駝騾餵養車輛雇價  
均循前案楚軍營制與

奏定章程及准銷成案分別截清起止日期接續造報湘平折實  
庫平仍扣雜款一分平餘又馬隊倒補馬價係照駐紮省分營驛  
例價核給采辦製造工價水陸轉運糧餉軍火等項雇川車船夫  
工價脚係核計斤重程途里數悉照軍需則例應屆准銷各案核  
給飭據金陵報銷局司道等詳稱自光緒五年正月起到去年底止  
列爲第八案舊管項下上屆截至光緒四年十二月底止實存銀  
七十二萬三千四百三十七兩一錢有奇新收項下綜計浙江四  
川湖北等省協餉並江蘇藩關釐局額撥軍餉兩淮鹽釐及本案

扣存平餘等項共銀三百一十九萬六千五百六十九兩六錢有奇內登除撥解北洋籌辦防務購辦西洋鎗礮船塹等用應歸海防案內收銷銀五十萬兩又撥放金陵機器局製造工價應歸該局收銷銀二萬兩又附列專冊請銷補放淮軍各營光緒四年十二月月底以前欠餉銀七萬三千八百五十三兩七錢有奇又本案附請

奏銷洋鎗礮隊教習辛工礮費並操練後膛洋礮拉礮車馬餵養夫工倒補馬價及天津行營機器製造局工料用款采辦洋軍火價值等項計三冊共銀一十三萬八千七百一十七兩一錢有奇實計收用銀三百一十八萬七千四百三十五兩八錢有奇開除正雜各款遵照部議酌定軍需報銷章程各歸各部核銷計應歸戶部核銷銀二百一十一萬九千四百一十九兩三錢有奇應歸

兵部核銷銀四萬四千一百一十六兩二錢有奇應歸工部核銷銀六萬九千四十五兩九錢有奇統共請銷銀二百二十三萬二千五百八十一兩五錢有奇實存銀九十五萬四千八百五十四兩二錢有奇已撥支光緒六年正月起淮軍馬步水師營哨正雜餉項並購製軍火器械價值工料等用歸於後案舊管項下滾接造報等情具詳請

奏前來臣查淮軍分駐直東江蘇等省籌辦江海防務實關緊要此次造報光緒五年正雜款項均係循照歷辦成案實用實銷並無絲毫浮圖除收支各數分晰造具細冊咨送各部並飭將以後用款接續清理造報外謹會同南洋通商大臣兩江總督臣劉坤一專摺具

奏並繕簡明清單恭呈

御覽伏乞

皇太后

皇上聖鑒謹

奏

軍需交涉洋務片  
光緒七年正月十九日

再查淮軍各營洋鎗礮隊教習通事工匠人等辛工金陵天津行營機器製造兩局工料及采辦外洋軍火等項截至光緒四年十二月底止業經附

奏准銷在案此次造報光緒五年正月起截至是年十二月底止第八案內除金陵機器局係與烏龍山製造局歸併合為一事酌定每年准餉項下撥銀二萬兩自五年正月月起均由該局彙總造報詳請專案

奏銷外所有淮軍各營洋鎗礮隊教習通事工匠人等辛工礮費等銀四萬八百九十五兩八錢有奇又淮軍海防各營操練後膛洋礮拉礮車馬餵養人工倒補馬價等銀三萬五千二百兩五錢有奇又天津行營機器製造局委員薪糧工匠工食購買料物用

款並未辦外洋軍火價值等銀六萬二千六百二十兩七錢有奇  
以上總共請銷銀十三萬八千七百十七兩一錢有奇茲據該司  
道等按款復加查核均係奉文核實飭發並無絲毫浮冒戶造細  
冊詳請附

奏前來臣查前項各營洋鎗隊教習通事工匠人等辛工購買  
料物洋軍火價值各款皆與洋人交涉無例可循仍應照案據實  
請銷除將細冊咨送總理衙門戶兵工部查核外伏乞

聖鑒謹附片具  
奏



挑濬大清泮沱兩河下尾摺

光緒七年正月十九日

奏爲挑挖大清河下游並月闢泮沱減河以工代賑恭摺仰祈  
聖鑒事竊直境之大清河上承西北羣流及西淀巨浸由雄縣會  
白溝諸水東經保定霸州文安而趨東淀本爲五大河之一自嘉  
道以後久失修治日就淤廢前因巨款難籌先於上游任邱地面  
開趙王減河以分洩西淀盛漲新城地面開蘆僧減河以分洩白  
溝河盛漲並將清河隄工分別修築惟雄縣霸州保境內河身限於  
地勢本難多容漲水其自文安左各莊至臺頭二十八里零係入  
淀尾閘處處高仰狹窄每屆汛漲停積不下上游亦因之壅潰近  
淀近河之安州高陽任邱雄縣保定霸州文安等處頻受其害必  
將尾閘挑挖寬深使河水暢洩東淀達津入海又五大河中之泮  
沱河自山西發源奔注直境湍流急湍趨向無定自來不設隄防

同治七年由冀城北徙經晉州深澤深州安平饒陽獻縣河間任邱雄縣保定霸州下趨文安大窪波及大城其冀城南入子牙河故道疊次勘查不能挽復而現行河身下游本無出水之路文安久成澤國獻縣以下沿河州縣亦受害甚深前於河閒及文窪中先開引河秋後啟閘消減但來源極旺減水不多須於獻縣境內擇地另闢減河使其分歸子牙河達津入海臣於去冬調派助辦直賑浙江紳士候選道金福曾直隸候補道史克寬盛宣懷周金章分投前往詳細勘度並飭司道會同籌議旋據稟稱大清河下游擬從左各莊起挖口寬十三丈底以二五收分挖深一丈三四尺地勢漸去漸低挖深亦漸去漸減至臺頭淀邊挖深九尺上下可得順行之勢其挖出之土各在十丈以外分別培隄並先築壩截流挑埽攔水使船隻暫由勝芳河中亭河行走以便開挖惟近

淀之處兩面皆水且老蕪淤入土根深工程甚屬不易須臨時設法搶辦至淀身人力難施之處卽以機器船接挖約需工費銀十五六萬兩又漳沱減河擬從獻縣朱家口起由半截河頭向東循舊有河形至野廠轉北入于牙河地勢水性皆順本係舊河無礙民居墳墓計工長三十三里零先築攔水埝壩挖口寬十一二三丈底寬五丈高處挖深一丈八尺最窪之區挖深七八尺於河身兩旁五六七丈以外出土堆隄惟上口適當水窪頗難措手中間須整開沙岡工更煩重亦應臨時設法搶辦並於沿河沿隄安設木橋渡船涵洞以便行人而洩隄裏瀝水約需工費地價銀十六萬兩等情具稟前來臣查所擬辦法均合機宜大清河下游旣暢則消水可速上游淀河亦不致過於阻遏近淀州縣水患較輕漳沱有此減河雖不能全溜歸槽實添一大消路目前可減獻縣

河間任雄新保文大一帶水災若將來新河衝刷寬深或冀北流  
截止文達有涸復之日直境應辦河工尙多此係擇要經營關係  
十餘州縣民生休戚必不可緩已派金福會督辦大清河下游工  
程史克寬督辦潯沱減河工程各將界址預行清理安籌一切俟  
春融凍解即便核實興辦剋期竣工仍集附近災民以工代賑一  
舉兩得惟兩河工費地價共需銀三十一二萬兩直庫本極支絀  
民力又甚拮据部款亦難指請惟有商懇東南各省勸捐解濟幸  
承各該省官紳士商顧念畿疆工賑緊要陸續設法集助約可得  
銀二十餘萬兩尙不敷銀約九萬兩再由臣督同司道竭力挪湊  
應急事竣仍歸賑案彙開清單奏報至南省官紳代集巨款拯救  
災區或更遠來勘辦不辭艱苦實屬無分畛域好義急公有裨大  
局擬俟事竣與實在辦工出力者查照河工章程擇尤酌懇

恩施以昭激勸其出費官民並照奏定賑捐章程核獎理合恭摺  
具陳伏乞

皇太后

皇上聖鑒訓示謹

奏

答覆朝鮮所問事宜摺

光緒七年二月初二日

奏爲朝鮮委員來津請示斟酌答覆相機開導恭摺仰祈

聖鑒事竊上年九月間朝鮮齎奏官卞元圭來津奉

旨令臣交籌該國學習製造練兵各事業經詳晰覆陳在案嗣接

出使日本大臣何如璋函稱朝鮮外交一事近日廷議漸知變計

又准總理衙門函商隨時設法維持調護並奏請嗣後遇有關係

洋務緊要之件由臣與該國通遞文函相機開導等因奉

旨依議欽此欽遵密行知照前來適有朝鮮國王委員李容肅隨

今屆貢使來京於正月二十日赴津稟謁據稱專爲奉辦武備學

習事並齎呈該國請示節略一本內載有領議政李最應奏章頗

悔去年六月堅拒美國來使爲非計未則歸重於及今之務莫如

懷遠人而安社稷等語又問他日不得已與各國相交先後早晚

之策又索中國與各國修好立約通商章程稅則帶回援照是何如璋所稱朝鮮國王與執政大臣決意外交而未敢遽發固已確有明證正因其節略諮商事件繁瑣先令津海關道鄭藻如等傳詢一切擬議大概旋准李咨肅進見與之筆談良久該國軍額極虛餉力極絀誠慮無以自立而所據形勢實爲我東三省屏蔽關係甚重現其君相雖幡然變計有聯絡外邦之意國人議論紛歧尙難遽決自應乘機開誠曉諭冀可破其成見固我藩離惟該國於外交情事生疏卽如與日本通商五年尙未設關收稅並不知稅額重輕設再與西國結約勢必被其欺蒙無益有損臣因其來牘有披露腹心願一一開誨碩畫之語出於至誠遂令前在西洋學習交涉事宜之道員馬建忠與鄭藻如等參酌目今時勢及東西洋通例代擬朝鮮與各國通商章程底稿豫爲取益防損之計

交李咨肅齋回俾該國遇事有所據依不至多受蒙蔽又聞該國君相已漸回悟惟原任太師李裕元等不無異議臣於光緒五年七月間曾遵

密諭轉致李裕元詳切開導嗣接覆書尙未敢遽爾信從此大李裕元來書似仍有不欲遠交之意臣覆函又加敦勸使不至從中作梗此後無論何國再派人往朝鮮議約當無堅拒之理但未便由中國強爲驅迫耳至其節略所詢各條內惟答覆日本國書稱謂一節儻稍涉含混卽於屬邦體例有礙臣查西洋各國稱帝稱王本非一律要皆平等相交該國王久受我

朝冊封其有報答日本及他國之書應令仍用

封號國政雖由其自主應不失中國屬邦之名除將朝鮮寄呈節略及代擬通商約章李裕元來往函稿鈔送總理衙門查核外謹



將酌覆朝鮮詢問各條照繕清單恭呈  
御覽是否有當理合恭摺由驛密陳伏乞

皇太后

皇上聖鑒訓示謹

奏

謹將酌覆朝鮮詢問各條照繕清單恭呈

御覽

第一條

小邦今與日本開港通商然小邦素昧商規恐被欺壓上下得頗  
儻邀上國商人來會開港諸處互相交易情志既孚依賴必大云  
而又有黃參贊策略卽奏請推廣鳳凰廳貿易令華商乘船來開  
港各口通商以防日人壟斷之句語此論恐未知如何伏候亮教  
具咨仰請而措詞主何妥當乎並望訓示

朝鮮向無海道貿易之例現既擬與外國通商則華商前往貿易  
亦所不禁至於黃參贊策略防日人壟斷之語果能與各國通商  
日人自無從壟斷將來如願華商前往貿易應由國王將實在情  
形咨請核

奏辦理

第二條

敢問小邦他日有不得已與各國相交之際自主自強利權在我不爲他要挾且不失先後早晚之策

此條已於上年九月二十二日曾與齋奏官卞元圭詳晰言之當必於回國時面陳總宜先事豫防自主之權操之在我茲有馬道臺所擬與外洋通商約章節略一冊交付帶回以資采擇

第三條

小邦釜山元山兩港定稅既蒙大人訓示敢不卽速議定第伊言非全權委任不可舉擬若值全權之來議值百抽幾當恪遵指津隨機圖之各國修好立約通商章程稅則稅額條款稅關設官凡例伏想已有印行文字願蒙賜下各一件謹當帶回援照

釜山元山兩港定稅宜由國王委任委員予以議稅全權字據俾與彼國使臣互換觀看以資取信此乃各國遣使議事之通例也至稅則值百抽幾不必援中國所定通商稅則爲例緣前者中國於外國情形尙未深知僅爲體恤商民而設進出口各貨皆係值百抽五若洋貨運入內地再抽二五子口稅其實未可執一而論上年亦面告齎奏官卞元圭矣若外洋抽稅皆視貨物之暢滯以定稅則之多寡竟有值百抽三十以至值百抽百者若以各物統扯論之大約不在值百抽十五以下今朝鮮國擬與外洋通商備各貨暢滯未能豫知則值百抽幾亦難豫定不若定一試辦統例進口貨估價值百抽十出口貨估價值百抽五至食用等物數滿十件者亦照則抽稅如此試行三五年貨物之暢滯可知卽則例之多寡可定然後與外洋各國重定稅則洋人決無不從之理蓋

和約與商約有異在我不肯和約決無開釁之端在我欲修商約  
斷無興戎之舉不然歐洲瑞士比利時蕞爾彈丸介於諸大國之  
間將商約不修稅則不加而國不足爲國矣至中國各口稅關或  
設監督專管或飭巡道兼管從前初開通商口岸華人罕諳洋文  
洋語收稅事件雇用洋人司理仍歸監督巡道節制今朝鮮擬與  
各國通商日本窺知朝鮮未諳西洋語言文字及稅務事宜難保  
不以管稅一職自薦充當但日本朝鮮僅隔一水往來商貨必多  
且開通商五年尙未收稅喫虧已甚儻雇日人司理稅務尤恐滋  
弊祇有暫雇西人之明白稅務兼通漢文者令其隨同朝鮮所派  
管關官員料理收稅較爲妥當並一面速選聰穎子弟從所雇西  
人學習語言文字稅務事宜學成之後自無容再用西人矣日本  
初與各國通商於暫雇西人料理稅務兼司教習一節辦理甚妥

是以該國現在稅務辭退西人已能自行管理茲將中國所有通商章程稅則稅額條款飭津海關道檢交該員帶回以資考證

#### 第四條

北洋咨式似依禮部咨式書呈而內書北洋督署大臣外書一體繕寫恐未知如何

北洋咨式應與禮部相同內外銜稱應書

欽差北洋通商大臣衙門字樣

#### 第五條

伏見禮部咨示中有委員弁兵學徒通事人等由北洋大臣衙門給發空白憑票交該國按名填給之語空白憑票許令此次帶回以爲隨用之地伏望

據關道等面詢稱係先派學藝人來業由該道等詳請給發憑票

十張交該員具領帶回呈收如學藝人分起前來應按每起填用一張交管領之員執持以憑查驗

### 第六條

學習人徒來往既蒙徑從海道自更便捷之教恐是賃乘汽船吉利涉海當自何處賃船可以無礙亦蒙公文不致盤詰

據關道等面詢稱由朝鮮進鳳凰廳邊門計程一千一百餘里再到牛莊營口約三百餘里即從營口或附輪船或附帆船來津較爲便捷應於進邊門時將憑票呈東邊道衙門查驗於到營口時將憑票呈奉錦山海關道衙門查驗均候加戳放行若遇有交涉事件仍由地方官約束訊斷

### 第七條

小邦船舶本無旗標今將議造而黃參贊有奏請襲用中國龍旗

之論敢問中國船上旗身畫樣而小邦則用某色某畫是否行當  
乎  
凡西國商船旗式皆係國主之旗因海上往來俾知爲某國船隻  
今貴國王自用之旗據稱是畫龍方旗亦與中國龍旗相仿自可  
以畫龍旗爲國旗卽作爲船舶旗標應於定用之先將龍旗尺寸  
顏色繪具圖式咨明本大臣衙門以憑核  
奏咨行

### 第八條

卑職未渡鴨綠聞日本使花房義實齎其國書而來敝朝以爲條  
約中曾有我禮曹與伊外務省書契往來而已無國書往來之規  
今何遽變條約乎以此難之彼云現陞辦理公使不可持外務書  
契且各國皆有國書然後益加親睦力懇不已國王特念鄰誼親



臨便殿召接彼使而受之書辭敬白等句頗恭非慢至若皇帝字  
朕字極涉礙眼上下俱爲不安且書中所請駐劄最難應從彼言  
仁川開港亦不可輕許廷議仁川開港強許以遷就幾年駐劄則  
欲因仁川事彌縫然彼之從否姑未可知國書不可不答而稱他  
曰帝實所不願至於自稱又無援照往復之際如何撰措庶不失  
國體而免笑於各國乎彼之意望又在專价修答非徒事力不敷  
隨請隨行豈不損弱乎大人旣垂厚念視均一室故茲敢膽上彼  
之國書與口奏伏乞俯鑒指賜良策使我東藩得以固圉全安焉  
使臣駐京西洋各國皆同蓋旣通商必有交涉事件公使之駐京  
猶之領事之駐口岸非此不能遇事互酌以聯兩國之誼以平兩  
國之爭實有益而無損也特東西風氣各殊猝議駐京鮮不意存  
顧慮中國從前初與西國通商開口時情形亦然揣度事勢旣經

立約通商斷難始終拒絕與其勉從於後日似不如慨允於目前  
況日本使臣駐京一節查光緒二年貴國與日本立約業於第二  
款載明現彼據約而求備不允許即為背約其曲在己未免授人  
以隙至仁川一港係由海道達王京必由之路如已允開即踐守  
前諾似亦無礙至所云自稱又無援照往復之際如何措措庶不  
失國體而免笑於各國等語茲日本遣使齎奉國書將來貴國答  
以國書乃兩國禮尚往來之義答書如何措詞想貴國自有討論  
而潤色之者至於國書內所稱名號歷查西洋各國書籍內所載  
聘問國書譯其稱謂本非一律如德意志俄羅斯奧斯馬加等國  
主皆自稱為帝意大利口斯巴尼亞瑞典等國主皆自稱為王開  
有譯漢文為君主及君王者英吉利國主男則稱王女則稱后迨  
前六年始加印度皇后之號如稱王之國致書於外洋稱帝之國

彼此亦各從其本稱永嘗以稱帝爲尊稱王爲小也貴國久受  
中朝冊封如有報答日本之書理應仍用  
封號將來傳聞各國衡以西洋通例當無笑貴國爲失體者

唐仁廉不能赴吉摺

光緒七年二月初六日

奏爲吉林請調總兵仍須在本任辦理海防急切難易生手恭摺  
仰祈

聖鑒事竊臣欽奉光緒六年十二月二十五日

寄諭前據銘安奏請調總兵唐仁廉差遣旋據李鴻章奏該總兵  
統帶所部駐防海口且有承辦要務未能派赴吉林茲據銘安喜  
昌奏稱現聞該總兵修築礮臺業已告竣仍請飭調赴吉總統三  
姓防營沿江礮臺亦令相度辦理等語著李鴻章卽飭該總兵迅  
赴吉林俾資防守等因欽此當經轉行遵照惟查唐仁廉係實任  
通永鎮總兵飭統馬步五營駐紮北塘海口該處爲畿境緊要門  
戶實與大沽防務並重雖礮臺營牆逐漸修築苦於經費支絀尙  
未完工應設礮位亦未齊備並應添造水雷地雷電鏡等房及儲

備軍糧子藥庫其煙頭沽調駐練軍一營亦歸該鎮節制尤宜及時趕修礮臺俾資犄角唐仁廉素稱驍勇熟悉北塘沿海情形該處防務工程購料出齊春融興作須責令一手經理况靈軍馬步各營分紮樂亭灤州一帶均係通永鎮汛地唐仁廉又爲鮑超舊部主客之交賴其照料聯絡唐仁廉辦理北塘防務數年兵將相習若遽易生手誠恐呼應不靈致滋貽誤至吉林三姓江防亦關緊要吳大澂前委直隸州知州戴宗騫募練馬步五營銘安等所調副將劉超佩三營郭長雲一營現在併紮三姓該將領皆久在直隸軍中於訓練紀律修築礮臺情形均尙熟悉又有吳大澂往來督率但使餉械不至短缺號令無所紛歧籌防可臻穩固唐仁廉與戴宗騫郭長雲等素未共事卽強令前往統帶轉慮不能得力於吉林江防無甚裨助而

畿輔海防亦乏替人除咨糧銘安等知照外理合恭摺陳伏乞

皇太后

皇上聖鑒訓示謹

奏

查覆招商局參案摺

光緒七年二月十一日

奏爲查明招商局員被參各款分別整頓辦理恭摺仰祈

聖鑒事竊臣欽奉光緒六年十一月二十六日

寄諭祭酒王先謙奏招商局務宜加整頓各摺片設立招商局原  
期收回中國利權如果局員等營私害公敗壞局務亟應痛加整  
頓李鴻章創辦此局責無旁貸著逐一嚴查認真整飭如唐廷樞  
等實有侵帑把持並設計排擠各情卽行從嚴參辦葉廷眷經理  
是否確有成效其辦理章程有應變通之處及早設法該祭酒請  
令商船出洋目下情形能否及此將來如何漸次開拓妥籌具奏  
等因欽此遵經札派江海關道劉瑞芬天津海關道鄭藻如將所參  
各款逐節嚴查旋據該關道會同南洋所派之江南製造局道員  
李興銳稟附招商局銀錢帳目向由駐滬道員徐潤一手經理當

向調冊前核並就原奏分條查覆如朱其昂等購船價貴均卽沈沒虧折殆盡一節該關道等查同治十一年已故道員朱其昂購買伊敦福星水清三船於上海天津各立碼頭運漕攬貨因創辦之始外洋及貿易情形未熟船價稍貴其用人濫而糜費多亦所不免次年添派道員唐廷樞徐潤會辦增置輪船碼頭頗有餘利將朱其昂虧折四萬餘兩分年提補其伊敦一船旋在大沽遭風沈沒福星一船在黑水洋被英船撞沈令洋商賠結此皆事出意外並非船不堅固該局厚生江長兩船亦在江海失事均歸保險局償還於局本尙無虧損又原奏唐廷樞盛宣懷以公項私買旗昌股票抵數卅幣人已旗昌原本已虧收買時仍照原本開報一節該關道等查光緒二年處撥給官款係添購豐順保大江寬江永四船之川唐廷樞等並無挪移私買股票是年冬收買旗昌



輪船等項由南洋撥給官款銀一百萬兩分期交付旗昌洋商取  
有收據且係徐潤經手唐廷樞盛宣懷更無扣帑入己之事惟應  
付旗昌銀二百二十二萬兩除撥官款外應照盛宣懷等原稟由  
各商湊集銀一百二十二萬兩乃僅招商股四萬餘兩以之抵還  
旗昌一百二十二萬兩所短甚巨遂由局借墊銀四十餘萬兩付  
給旗昌尚短銀六十九萬兩係將官本緩息商股存息以及保險  
餘費按年積存陸續歸楚未踐原稟之言致有疑爲詭詐者洋商  
房產交易向有五釐中金分給經手之人卽盛宣懷等原稟花紅  
是也門價至二百餘萬之多應提花紅銀數不少盛宣懷等主持  
其事卽使毫不沾染難免羣疑眾謗至旗昌股票唐廷樞徐潤或  
有一二盛宣懷久在仕途未必有此卽有股票不難逕向旗昌取  
銀何必割扣付款且旗昌亦斷不肯將應收價銀任唐廷樞等割

扣入已其輪船等項買價二百二十二萬兩係照市值估價並未將旗昌虧折之數併入買價開報亦屬眾所共知又原奏侵虧之銀加辦輪船各值之上葉廷眷接辦起色被唐廷樞盛宣懷排擠畏咎引退唐廷樞等恣意侵挪一節該關道等查招商局木上屆結帳計存官款銀一百九十萬兩有奇商股八十餘萬兩所置輪船碼頭等項其實用銀三百六十五萬九千二百兩以存抵用短銀九十二萬五千餘兩除以保險公積等款濟用外尙短銀七十萬五千餘兩係由唐廷樞徐潤等向錢莊借墊並無現銀存局無從侵挪現將碼頭船棧等項核估市價尙屬相符可信其無加攤各值之事至從前獲利無多未能卽除船舊光緒四年七月至六年六月兩屆結帳均有盈餘共除船棧成本銀八十餘萬兩此後若逐年得利陸續減折將可折成船料道員葉廷眷係光緒四

年秋開由唐廷樞等稟請奏委人局會辦因於生意未悉始則力辭繼則稟明試辦一年到局後卽赴蘇浙江鄂等省商辦酒務迫回滬與唐廷樞等商議將總分各局用費盡成經手之人包辦稍得節省五年春赴津通交米至秋南旋中途感冒兼以老母多病具稟乞退未准隨卽請假侍奉歸調葉廷眷之人局係唐廷樞等稟請決無排擠之事且局中結帳皆有餘利局務尙有起色亦何至畏咎引退又原奏官款分年提還局務歸商而不歸官是以庫帑供唐廷樞等營私之用一節該關道等查光緒六年臣與署南洋大臣吳元炳奏定商局官款除還東海關等銀十二萬餘兩外尙存銀一百七十餘萬兩自是年起分作五年將運酒應領水腳全數抵還其輪船運酒用費取給攬載客貨之中以後生意盈虧在商不在官使官帑先有著落等因蓋專指生意盈虧而言非謂

局務卽不歸官也又查光緒三年奏案官款自是年起緩息三年俟光緒六年起勻分五年緩息按本統計八年官款全清其緩收息款以後或作官股或陸續帶繳屆期察看情形再議等因是至光緒十一年官本還清之後尙有八年息銀約九十餘萬兩若存局作爲官股應由局按年繳利否則由局將原息陸續繳官斷不能任唐廷樞等自肥私蒙該關道等又查臣於光緒六年六月奏准將各省借撥該局官款每年應還銀三十五萬餘兩酌提三屆合銀一百餘萬兩以抵訂造鐵甲船之需與商局並無出入自應逕解北洋無須如原奏由南洋收解其餘兩屆應否由南北洋分收撥解請屆時酌定又查總分各局銀錢出入定章本應按船開報若如原奏用關道三聯印票殊於商情體制有礙應無庸更張並據該關道等籌議華商運茶華船出洋二事暨整頓商局事宜

具稟前來臣詳核該關道等查覆各節大致明晰但尚有錯誤之處查光緒二年冬盛宣懷等公稟南北洋原案據收買旗昌輪船等項合銀二百萬兩議由是年十一月十九日付頭批銀二十萬兩十二月十八日付二批銀二十萬兩次年正月十七日付三批銀六十萬兩即行交盤此外一百萬兩作為旗昌暫存商局八釐起息分期歸還又漢口等處碼頭等項蓮花紅合銀二十二萬兩於六箇月內交銀過戶惟商局並無餘力此項資本二百二十二萬兩除旗昌尚有華股二十萬兩可勸令仍充股分外請撥官本銀一百萬兩並飭兩淮運司會勸淮商每一引搭股銀一兩可得銀七十九萬二千餘兩再通飭各藩司各海關道隨時勸諭商富搭股等情當經臣鈔咨總理衙門查核有案是原稟並無已集商股一百二十二萬兩之說不得謂其詭詐欺朦嗣因怡和太古兩

行更相傾擠各司道既未幫同勸諭各商亦未卽附本故僅集股銀四萬餘兩此則時勢使然未可苛責局員者至該局既驟難集股自不能不暫向錢莊借墊及以緩息等項應急係屬變通辦法亦不得怪其未踐原稟之言又花紅卽是中金一節臣傳見當日經手之唐廷樞面加嚴詰據稱係上海金利源輪船公司所得蓋旗昌兼辦金利源公司每年得行用銀十餘萬兩今將全幫輪船賣給商局其公司生意卽歸局經理該公司行主每年少十餘萬進項而各口所用辦事人等給予薪水盤費令其回國或另謀事是以於漢口等處碼頭等項價銀之內議及花紅以爲該公司津貼彼先索要漢口等處碼頭等項價銀二十五萬兩花紅銀十萬兩商局僅共給銀二十二萬兩立有約據聲明此項價銀二十二萬兩其售於本局上海輪船公司之花紅亦在其內且經鈔呈轉

咨總理衙門有案所謂上海輪船公司者卽金利源也所謂上海輪船公司之花紅者卽金利源所得也開載本已分明不難調據查考此事雖盛宣懷徐潤朱其詔先至金陵請示而各項價值均由唐廷樞與旗昌行主面議既係兩家自行成交並無居間之人焉有中金之理盛宣懷於畫押之日已赴湖北礦局並未在場所有商局應付旗昌價銀二百二十二萬兩均已陸續交付明白不但有合同收字爲據且各次付銀係西洋匯豐銀行代收一付一收鍼孔相對又有商局旗昌匯豐三處帳簿可憑若有分文花紅交付商局經手之人儘可查詢旗昌行主調核各處帳簿卽在滬股商及本局所用華洋各夥千百人亦屬其見其聞斷難掩飾等語情詞甚爲真切臣疊次訪察亦未聞有盛宣懷等沾染絲毫中金之事乃該關道劉瑞芬等於集股一節並未細查原稟於金利

源所得花紅一節又未調查收銀字據疑爲商局經手人所得中  
金殊屬錯誤應卽照案更正以昭平允至招商局爲收回中國利  
權關係大局甚巨臣於同治十一年定議創辦誠如

聖諭責無旁貸是以營維維持整頓嚴飭局員實心經理以期久  
遠不做隨時奏明有案事雖商辦官仍督察並非漫無鈐制斷不  
容其恣意侵漁該局本爲洋商嫉妬從前旗昌怡和太古三行合  
力傾擠疊將水腳跌價有減至一半者有減至三分之一者商局  
不能不隨之俱減以致無利有虧商股亦多裹足迨收買旗昌後  
資本短缺又有修理船隻之用仍須出息借貸並飭運直晉賑米  
多而且急局船不敷調用由局代雇洋商輪船賠貼水腳損剝等  
費嗣經唐廷樞等與怡和太古設法議和生意順手意外虧賠之  
費亦少故自光緒四年七月至六年六月兩屆結帳皆有盈餘僅



借錢莊銀七十餘萬兩較之光緒三年缺本一百四十餘萬兩已減輕七十萬兩又除船費等項銀八十餘萬兩其尾欠旗昌價銀六十九萬兩亦經歸結清楚實係漸有起色盛宣懷早經到直候補局務已不與聞其會議收買旗昌乃去一大勁敵洵屬借實定主之謀劉瑞芬等稟覆亦謂其具有遠見於商局不爲無功該員與唐廷樞等既無侵帑害公把持排擠情事均應請

旨免其置議唐廷樞熟悉中外語言文字船務商務與徐潤辦有成效應仍責令唐廷樞徐潤實心經理由臣等隨時稽查督飭其一切出入帳目按期分晰開報俾供眾覽每年結帳時照章由滬津兩關道就近赴局清查一次所有該局內外各項挂欠帳目十餘萬兩卽令唐廷樞徐潤分別催收追繳提還具報嗣後不得挂欠轉致轆轤劉瑞芬等以攬載客貨難免代攬之人挪前壓後或

串通輪船司事以多報少銀兩延不解局其局中股票聞有巧滑  
之徒減價收買另招新股更名抵給從中漁利擬請整頓兩條應  
嚴飭唐廷樞徐潤認真釐剔防範力杜流弊凡用人一切不得稍  
涉瞻徇浮濫糜費違則從嚴參辦至局存各省官款銀一百七十  
餘萬兩臣前已奏定自光緒六年起由運漕水腳內分作五年扣  
還內應酌提三屆銀一百餘萬兩抵作訂造鐵甲船之需其第四  
屆第五屆銀約七十萬餘兩仍應歸還各省內如湖北省因上年  
裝運靈軍來直輪船水腳無款可籌已擬將第四屆官本作抵浙  
江省因海塘工程需款屢請提撥濟用此外各省情形略同自應  
將第四五兩屆應還官本屆時於運漕水腳內照數扣出撥還各  
省歸款以符原議而免紛更其八年緩息之款合銀九十餘萬兩  
並照奏案或作官股生息或陸續帶繳屆期察商核辦至王先謙

片奏華商運茶赴俄照俄商稅則辦理並設宏遠公司華船運貨  
赴外國兩節查俄國需用之茶向由華商專運獲利頗厚今被俄  
商佔去據劉瑞芬等稟稱能將華商運俄之茶亦照俄商稅則只  
完正半兩稅自可漸復華商舊業有裨大局不惟招商局轉運獲  
益客臣咨商總理衙門核辦至黎兆棠前擬設立宏遠公司以巨  
費難集尙未定議招商局船前曾駛往新嘉坡小呂宋日本等處  
因該處各有公司輪船攬載未能與抗光緒五年派和眾船試走  
夏威仁國之檀香山美國之舊金山該兩處華人雲集裝載客貨  
尙旺六年添派美富輪船常川往來臣因訂購英廠碰快船將成  
遊派員弁水手出洋驗收飭局派海琛輪船裝載駛往倫敦是華  
船赴外國招商局已經試行劉瑞芬等謂應就局船相機逐漸推  
廣藉資獲益自應照辦所有查明分別整頓辦理緣由謹據實恭

捐由驛覆陳伏乞

皇太后

皇上聖鑒訓示謹

奏

東海關京餉分年核議摺

光緒七年二月二十五日

奏爲東海關洋稅奉撥京餉五年分業經解足六年分收數不敷報解擬請展緩免議恭摺仰祈

聖鑒事竊據東海關監督登萊青道方汝翼稟稱東海關六成洋稅光緒五年奉撥京餉銀五萬兩係於是年七月十二月兩次委解足額並無帶欠奉有印收批迴惟戶部仍奏請議處應懇查案更正至六年分京餉五萬兩本應依限解足但稅款之旺衰視乎商船之多寡上年各自籌辦海防大軍雲集人心驚疑船貨頓少以致洋稅收數甚絀且天津爲京城門戶練兵月餉甚關重要向指津東兩關洋稅不得不先其所急以維大局然亦不能按額解齊計自光緒五年十一月二十日第七十八結起至六年十二月

初一日八十一結止實收六成洋稅招商局船稅及半稅銀十七

萬三百餘兩連七十七結存銀二萬三千九百餘兩共合銀十九萬四千二百餘兩已批解部庫五年分京餉二萬五千兩抵作閩餉一萬兩六年分京餉二萬五千兩抵作閩餉一萬兩又解津防練兵月餉五萬兩又出使經費一萬九千八百餘兩又稅務司薪水及本關經費六萬四千四百餘兩總共解支銀二十萬四千二百餘兩以收抵支實不敷銀一萬餘兩係暫時設法墊解是以除欠津餉外尙欠六年分京餉銀二萬五千兩委係無款可籌非敢藉詞延宕查洋稅向係儘徵儘解如本款徵數有限報解未能足額歷有屢緩免議成案可循此次因各省辦防商貨減少稅收短絀實由時勢使然稟請

奏咨前來臣查五年分京餉該關既經解清其戶部奏請交議之案自應更正至六年分京餉收不敷解係屬實情尙非無故延欠

且已墊解萬餘金現在尙未歸補相應仰懇

天恩俯准將下短六年分京餉銀二萬五千兩照案暫行展緩免其議處俟稅收稍旺卽行補解以資周轉除咨明吏戶部外理合會同山東撫臣周恆祺恭摺具陳伏乞

皇太后

皇上聖鑒訓示謹

奏

東明仍請改要缺摺

光緒七年二月二十五日

奏爲直隸東明縣中缺現有黃河重大工程仍請改爲沿河要缺恭摺仰祈

聖鑒事竊大名府屬之東明縣知縣本係二字中缺向無河道隄工自咸豐五年河南銅瓦鑲黃河決口改道北行該縣適當其衝遂阻於河之南岸歷年頻遭水患地方凋敝閭閻困苦獄訟滋多凡撫恤災荒緝捕盜賊審理案件頓增數倍光緒二年境內創築南隄一道縣互六十餘里又有修防之責非通曉吏治諳悉河務之員殊難勝任臣於光緒三年

奏請改爲繁疲難三字沿河要缺遇有缺出由外揀員分別調補以期治理得人旋經吏部議覆應照例於本省繁缺內酌定一缺改爲簡缺方可將東明縣缺互換改繁等因臣查中簡缺分改繁



須擇一繁缺改簡之例係指地方尋常員缺而言蓋或彼縣田畝  
村鎮改隸此縣或彼縣人民商貨遷移此縣此增則彼減故可繁  
簡互換今東明因河道隄工請改繁缺與尋常事體不同查黃河  
係由他省遷來直省之河並無遷去焉有互換缺分歷年各省添  
改員缺甚多卽如山海關本係監督而改爲道員天津縣本係沿  
河而改爲海疆津海關本無道員營口本無同知而均添設並未  
議及互換可知因時因地以制宜不能拘泥常例也且黃河北徙  
從前南路各省沿河州縣皆已無工正可彼此相抵不必於直省  
互換直境爲黃河經由古開州長垣東明三州縣開州長垣距河  
較遠工段不多尙皆平穩無須改爲沿河字樣卽亦置之不議惟  
東明逼近河屬工長責重近來大溜直刷隄根奇險疊出去歲霜  
溝後竟致高村漫口雖已堵築合龍而此後修防事宜萬分緊要

必須責令地方官會同委員相機妥籌經理若仍按班選補此項人員情形既多生疏河工更非素習況距省千餘里斷難於選補到任誤事後始行撤換據藩司任道鎔臬司方大湜查明現在本省丞倅牧令繁要沿河各缺中實無可改中簡之缺相應仰懇特恩俯念黃河工程重大准將東明縣知縣改爲繁疲難三字沿河要缺免其互換嗣後遇有缺出揀員分別調補毋庸按班輪用以裨地方理合恭摺具陳伏乞

皇太后

皇上聖鑒訓示謹

奏

懋陳感悚下忱摺

光緒七年三月初四日

奏為懋陳感悚下忱恭摺仰祈

聖鑒事竊臣恭閱邸鈔二月二十二日奉

上諭通政使司參議劉錫鴻奏疆臣不堪倚任臚款參劾各摺片披覽所奏殊堪詫異李鴻章久任封圻深資倚畀其平日辦事原不能一無過失朝廷隨時訓誡亦未嘗稍有寬假據劉錫鴻所陳各款如奏留藩司任道鎔入覲為蔑視綱紀覆奏籌備餉需一疏為藐抗朝廷腹非論旨優保委員黃惠和等為妄言欺謾等情深文周內已屬支離至謂其跋扈不臣儼然帝制並以荒誕不經之詞登錄奏牘肆意傾陷尤屬謬妄糊塗朝廷於馭下聽言一秉至公似此信口誣蠱不可不予以懲處劉錫鴻著交部嚴加議處欽此跪誦

綸旨戰慄惶罔知所措伏念臣本無學術又乏才能惟此報

國之孤忠所自盟於幽獨者始終未敢稍懈徒以久在軍中積受勞傷今已年屆六旬精力日憊衰病交侵責任過鉅政務過繁往往有精神疏漏之處偶不及檢輒叢咎謗祇緣受

恩深重時事艱難未忍乞一日之假偷一息之安致廢要公貽憂

君父不圖劉錫鴻挾臣上年遵

旨奏撤出使德國之嫌橫生蜚語被以惡名若依所言生既無顏

監廁於

朝班死亦未能塞責於地下自非我

皇太后

皇上天地再造之恩察臣無他明臣無罪雖復肝腦塗地天下後

世誰喻臣心此臣所由感激

仁施不禁嗚咽自傷寢食俱廢者也惟是下之過失本在

聖明涵覆之中曲宥

微臣

已爲至幸聞及言者亦所難安以臣誤

叨重寄積有愆尤清夜自維凡所設施愧未克仰副

訓詞稍贖眾望就使指摘未及臣亦時切兢兢惟有益勵恪恭常存敬畏集眾思以攻闕矢小心以奉公不敢愛身不欲文過冀無

負

朝廷倚畀保全之至意臣不勝犬馬怖懼謹繕摺瀝陳伏乞

皇太后

皇上聖鑒謹

奏

會國荃乞假南歸片

光緒七年三月初四日

再新授陝甘督臣會國荃此次回津會商交卸山海關防務足疾困憊情形較前更甚臣屢往看視據稱與北方水土不合積受凝寒兼因從前軍營傷毒串入筋絡是以動輒牽痛步履維艱須趁此時赴南中溫和地方設法調治猶可漸冀痊愈業蒙

恩賞假就醫仰見

聖明體恤下情無微不至該督臣以病軀狼狽未敢附搭輪船再受顛簸眩暈之苦一面將經手事宜交替清楚卽於三月初三日力疾登陸緩程南下理合附片陳明伏乞

聖鑒謹

奏

頤懋叩謝

梓宮摺

光緒七年三月十三日

奏為頤懋

恩准赴京叩謁

梓宮仰祈

聖鑒事竊臣恭讀三月十一日邸鈔

哀詔

遺誥驚悉

大行慈安端裕康慶昭和莊敬皇太后仙馭升遐搶地呼天神魂

飛越痛念

大行皇太后前後垂簾臨御寰宇近二十年無日不在憂勤惕厲之中值時局之多艱每潛移而默運

所宵勤政佑啟

中興

聖德

神功隆古無比何圖一旦委棄臣民溥海含悲焚號莫及矧臣待

罪畿州久荷

知遇之隆

倚畀之重

高厚生成汨埃莫報猝聞凶耗瞻望

闕廷五中摧裂罔知所措亟思就近叩謁一展哀戀之忱恭慰

皇上大孝伏冀

節哀順變隨時珍衛並瀝請

慈禱端佑康頤昭豫莊誠皇太后勉抑哀思藉資靜攝速臻康復

以慰中外億兆民人之望合無瀝懇



天恩准臣匍匐赴京叩謁  
梓宮虔申哀悃並卽瞻覲

天顏跪聆

聖訓不勝戰慄迫切待

命之至謹繕摺具陳伏乞

皇太后

皇上聖鑒訓示謹

奏

請撥鄂漕摺 光緒七年三月十八日

奏為順直災區民情困苦懇懇

特恩賞撥鄂漕以應春撫急需恭摺仰祈

聖鑒事竊上年順直各屬東北窪地被水西南高地被旱其計災  
歉六十二州縣經臣奏奉

上諭分別蠲緩糧租即就去春賑餘漕米及捐湊各款分撥散放  
窮黎藉過嚴冬並於預籌今春接濟事宜摺內聲明屆時察看情

形懇

恩酌賞南漕等因在案茲查東北較高地面水漸消退其低窪之  
處積水仍深麥收失望冬春雪雨稀少西南一帶益形乾旱春麥  
未能布種其已種者待澤孔殷疊臻災重之順天所屬文安大城  
霸州寶坻保定武清直隸所屬河間雄縣任邱高陽肅甯天津等

州縣紛紛稟請撫恤雖經籌款集捐於文安縣開濬大清河下游於獻縣戶關滹沱減河各數十里以消積患而興水利俾附近貧民備趁餬口但災區窮黎較多值此戶少蓋藏青黃不接謀生乏術飢困堪憐必應設法撫綏庶免委填溝壑直隸當大稔之後庫儲糶掘一空不得不作發棠之請查湖北省本年仍辦漕米三萬石業據招商局領價采購即可由輪船運津本屆江浙海運交倉漕米已較往年加增此項鄂漕三萬石爲數無多若截撥直賑於京倉尙無所損而近畿飢民實資全活合無顯懇

天恩賞給湖北本年采運新漕三萬石卽在天津就近截撥責成天津道吳毓蘭會同賑局認真驗收由臣督同司道詳察順直災區輕重及時分撥遴委妥員會同地方官確查戶口核實散放並酌量以工代撫務使實惠及民不准絲毫弊混其隨漕剝船耗食

米石及由津運通船價等項請照案飭令該局核扣解交賑局津貼運費如蒙

俯允所請

特旨宣示則

恩出自上益足固民志而廣

皇仁是否有當理合會同兼管順天府府尹臣童華府尹臣李朝

儀恭摺由驛具陳伏乞

皇太后

皇上聖鑒訓示謹

奏

請補造剝船二百隻片

光緒七年四月二十三日

再剝船之多寡必以米數為權衡從前江蘇起運漕糧僅五六  
萬石浙江僅二三十萬石是以剝船一千八百隻按兩省米數分  
成勻撥尙可敷用近年米數遞增上屆江蘇起運七十餘萬石浙  
江起運四十餘萬石本屆又增八萬餘石較從前計多四五十萬  
石剝船仍止此數實屬周轉不開雖疊飭天津道分派員弁節節  
催提務令回空迅速但米多船少每有停解待運之虞現當規復  
漕額必應添備剝船乃免貽誤查向例本有剝船二千五百隻核  
計現短原額七百隻勢難全數補足擬請先行補造原額剝船二  
百隻照例由江西承造一半湖南北承造一半均令於來年春間  
解到天津在該省補造無多尙易為力在直隸轉運稍速藉濟要  
需庶於漕務有裨擬請

救下該三省督撫臣迅速籌辦至直東運司撥解天津道庫工食油艙等項僅敷現有剝船用費其補造之剝船二百隻應請由部添撥工食油艙等項銀兩以資應用所有現短原額剝船請另補造緣由理合附片具陳伏乞

聖鑒訓示謹

奏

資遣湘毅軍片

光緒七年四月二十三日

再臣前與新任陝甘督臣曾國荃會奏分別撤留山海關防軍事  
宜奉

旨著照所議辦理務當悉心經理次第布置俾遣散撤回各營沿途安靜等因欽此查此次遣撤各軍以記名濟司劉連捷所統湘毅軍七營福祿壽三營爲大枝本擬五月初開飭該藩司帶至長沙六月下旬遣散卽以五六月之餉作爲川資惟該十營人數旣眾山海關距湖南三四千里若由陸路行走深恐長途難於約束復經會同商酌卽調招商局輪船由附近關門之秦王壩海口分批裝送上海酌換長江輪船送至漢口再雇民船駛赴長沙遣散歸農俾臻安速但須提早起程騰出月餉以作輪船水腳議定後卽分飭該藩司劉連捷暨招商局遵照旋據該藩司稟稱招商局

派永清日新漢廣鎮東輪船四號於三月十八二十一等日先後抵秦王島卽令記名提督葛清泰總兵朱連勝袁大陸王其章等分船管帶連行李軍裝等項作爲兩批裝送其山晉所募伙勇工役前已遣歸至中營馬隊衛隊交記名提督劉崑岷參將張其益帶領先由陸路開拔其餘各營弁勇概登輪舟南駛該藩司與郎中劉鴻年分批督率前進並據招商局員稟稱頭批兩船於三月二十二日到滬仍由原船轉運漢口後批兩船於二十五六等日到滬卽換江輪赴漢沿途均稱靜謐等情具報前來所有湘毅軍等十營全數遣撤緣由除分咨查照外理合附片具陳伏乞

聖鑒謹

奏



截留礮位解奉省片

光緒七年四月二十三日

再欽奉三月二十三日

上諭岐元等奏請將郭寶昌撤回各營內兩磅後膛礮六尊格林礮兩尊馬梯呢後門洋鎗五百桿並火藥鉛丸全數截留等語江南本有應解奉省軍械現在尙未解到著李鴻章飭令郭寶昌將該營礮位等項照數截留其應如何運解及酌留員弁兵丁俾資訓練之處並著李鴻章查明辦理所有此次截留礮位等項著劉坤一於機器局如數撥給由裕祿知照郭寶昌領用以利操防等因欽此其時已據郭寶昌呈報開拔頭隊回皖業將鎗礮等項裝船運津僅有兩磅後膛礮六尊尙存山海關防所經臣飛飭該鎮截留解奉卽據郭寶昌將兩磅後膛礮六尊委員廉誠由關逕解奉省一面揀派諳練鎗礮弁勇陳富超等六人隨往教練由郭寶

昌籌給運腳川資至馬梯呢後門洋鎗本係營勇逐日操練之件  
查明到津後業經各營自行攜帶南下難再追回其格林礮二尊  
及礮子七萬九千粒兩磅後膛開花礮子二千六百六十五筒拉  
火三千枝洋藥五千斤鉛丸五千斤銅帽二十萬粒銅五件八百  
四十副均由津截留飭據郭寶昌委員吳明鑲杜濬魁管解雇裝  
海船運赴營口交山海關道續昌驗收再由岐元派員提解應用  
所需由津至營口船價川資銀三百二十兩飭天津支應局墊發  
仍由奉省解還歸款至截留礮位各件卽由江南照數撥給郭寶  
昌領用除分咨查照外理合附片覆陳伏乞

聖鑒謹

奏

直隸開辦礦務摺

光緒七年四月二十三日

奏為直隸招商購器仿用洋法開辦礦務疏通運道漸有成效恭摺仰祈

聖鑒事竊惟天地自然之利乃民生日用之資泰西各國以礦學為本圖遂能爭雄競勝英之立國在海中三島物產非甚豐盈而歲出煤鐵甚旺富強遂甲天下中國金銀煤鐵各礦勝於西洋諸國祇以風氣未開菁華闕而不發利源之涸日甚一日復歲出鉅款購用他國煤鐵實為漏卮之一大宗從前江西之樂平及山西湖南等省皆以土法開采煤鐵等礦工力較繁而所得較微無裨大局近來如臺灣之基隆湖北之荊門安徽之池州經營煤礦漸用洋法然或因創辦伊始或因經費未敷尙難驟得大效臣於光緒元年四月間欽奉

寄諭著照所請先在磁州試辦派員妥爲經理等因欽此仰見  
朝廷恢拓遠圖至意旋經屢次委員往查磁州煤鐵運道艱遠又  
訂購英商鑄鐵機器不全未能成交因而中止旋聞灤州所屬之  
開平鎮煤鐵礦產頗旺臣飭招商局候選道唐廷樞馳往察勘攜  
回煤塊鐵石分寄英國化學師鑄化試驗成色雖高低不齊可與  
該國上中等礦產相仿采辦稍有把握三年八月臣檄派前任天  
津道丁壽昌津海關道黎兆棠會同唐廷樞熟籌妥辦旋據酌擬  
設局招商章程十二條批令刊刻施行迨丁壽昌黎兆棠先後離  
津現任津海關道鄭藻如復會辦局務查初定章程擬招商股銀  
八十萬兩開采煤鐵並建生熟鐵鑪機廠就近鑄化繼因招股驟  
難足額鑄鐵鑪廠成本過鉅非精於鐵工者不能位置合宜遂先  
專力煤礦采煤既有成效則鍊鐵必可續籌也唐廷樞奉檄設局

後勘得灤州所屬距開平西南十八里之唐山山南鶴煤穴甚多  
土人開井百餘口只取浮面之煤因無法取水而止光緒四年鑽  
地探試深六十丈得有高煙煤六層第一層厚十八寸第二層二  
尺第三層七尺第四層三尺第五層六尺第六層八尺其第六層  
之下尙有一二層但計所得之煤已足供六十年之用因是不復  
深探旋於五年購辦機器按西法開二井一提煤一貫風抽水其  
提煤井開深六十丈貫風抽水井開深三十丈地下開橫徑三道  
一在提煤井二十丈開洞門作旋風之用一在三十丈一在五十  
六丈兩道係取煤之用所有地下橫徑直道均與兩井相通其第  
一條橫徑南開四丈得覓第一層煤質略鬆煤層過薄豫備不用  
北開八丈得覓第二第三層煤兩層相隔只有一尺其質堅色亮  
燃燒耐久性烈而蒸氣易騰燒燼之灰亦少就目下二十丈深之

煤論之可與東洋頭號煙煤相較將來愈深愈美尤勝東洋惟煤產出海銷路較廣由唐山至天津必經蘆臺陸路轉運維艱若夏秋山水漲發節節阻滯車馬亦不能用因於六年九月議定興修水利由蘆臺鎮東起至胥各莊止挑河一道約計七十里爲運煤之路又由河頭接築馬路十五里直抵礮所共需銀十數萬兩統歸礦局籌捐非但他日運送煤鐵諸臻便利抑且窪地水有所歸無虞積澇而本地所出鹽貨可以暢銷是一舉而商旅農民皆受其益所佔地畝均照民價購買本年二月興工挑挖五六月可一律告成從此中國兵商輪船及機器製造各局用煤不致遠購於外洋一旦有事庶不爲敵人所把持亦可免利源之外洩富強之基此爲嚆矢據總辦開平礦務局員唐廷樞將大略情形具稟前來臣查唐廷樞熟精洋學於開采機宜商情市價詳稽博考胸有

成竹經理數年規模備當夫籌辦之始臣因事端宏大難遽就緒未經具奏今則成效確有可觀轉瞬運煤銷售實足與輪船招商機器織造各局相爲表裏開煤既旺則鍊鐵可以漸闢開平局務振興則他省人才亦必聞風興起似於大局關係非淺所有直境招商購器開辦礦務疏通運道緣由理合恭摺具陳伏乞

皇太后

皇上聖鑒謹

奏

請減出口煤稅片

光緒七年四月二十三日

再據候選道唐廷樞稟稱開辦礦務局以來購備機器延訂洋匠  
工司及買地築路挑河經費約共用銀七十餘萬兩成本既重煤  
價亦因之而昂若再加現定之稅額卽難敵外洋之煤其勢必不  
能暢銷而關稅亦鮮有實獲與其稅重而少所收不若減輕而多  
所納中國原定洋貨稅則過輕土貨稅則較重以致華商疲累難  
與洋商頡頏查西洋各國通例於外來進口貨稅無一不重於本  
國出口貨稅無一不輕所以徵外人之利而護本國之商斟酌損  
益實有至理乃中國初定約時爲外人所蒙轉使外洋進口之貨  
稅輕內地出口之貨稅重不啻抑華商而護洋商此通商後數十  
年之流弊隱受厥累而不覺者也卽以煤斤而論洋煤每噸稅銀  
五分土煤每担稅銀四分合之一噸實有六錢七分二釐若加復



進口半稅已合每噸銀一兩有奇盈絀懸殊至二十倍之多前兩江督臣沈葆楨於臺灣基隆開煤時奏准土煤每噸徵稅一錢較洋煤業已加重嗣湖北用機器開采亦奉諭旨准照臺灣稅則在案揆從前嚴定土煤稅章之意或恐煤稅減輕則土煤出口日多內地煤價必長故特重其稅以示限制惟是土法采煤只能售於近地若從陸路車運出口腳價太重斷不合算況其所采浮面之煤實不足供輪船製造等用如直隸西山等處煤產專濟五城內外之需並無轉運來津者是其明證似多運出口一節本可無慮今開平煤礦全用西法每日出至五六百噸之多據洋師測量足供六十年采取除運往要口分供各局及中外輪船之用並可兼顧內地民間日用刻下運道疏通腳價既省若再將稅則減輕煤之售價必廉可以暢銷無滯而運售於各

局者不致再用洋商昂貴之煤其有裨於公訟不少等情前來臣復飭津海關查取歷年洋煤土煤進口數目開具清單自同治十年起至光緒六年止洋煤進口計八萬一千五百餘噸土煤進口僅五千五百餘噸而出口土煤則天津向所未有蓋由稅則厚薄不一土煤壅滯難銷遂使厚利爲洋商所壟斷若不變通設法更定章程殊非通籌理財之大計合無仰懇

天恩俯准開平出口煤斤援照臺灣湖北之例每噸徵收稅銀一錢以恤華商而敵洋煤庶風氣日開利源日旺而關稅亦必日有起色矣理合附片具陳伏乞

聖鑒訓示謹

奏

請開平泉銅礦片 光緒七年四月二十三日

再天津機器各局製造子彈藥帽等項所需銅料購自外洋轉運艱而價值貴且恐不可常恃自應就中國自有礦產設法開采以期費省用便前據儘先題奏道朱其詔查得承德府平泉州屬鉛銅子溝地面本有銅礦於咸豐三年招商采辦旋以硎老奏明封閉實則當時僅用土法不能抽去硎水遂遽停歇並非硎老砂空今檢取砂石交機器局分化其中確有銅質成色尚佳可合製造之用當飭該道帶同熟習礦務之職員會同前往詳細察勘籌辦並與臣崇綺分飭地方官彈壓照料茲據該道覆稱該處銅苗頗旺雖硎水較深只須機器抽去仍可開采應在二十里外之了頭溝起造廠房安設鍋鑪融鍊無礙民居廬墓已將礦山廠地向業戶租定酌雇工匠及附近民夫開挖一面訂購西洋抽水起重吹

風等項機器陸續運往應用由該道招股集資試辦等情到聖前  
來臣查鉛銅子溝既有銅礦可資采鍊其成色甚合製造之用自  
應照議試辦卽歸機器局收買以興地利而濟軍需俟確有成效  
再行妥定章程所有委員試辦平泉州銅礦緣由理合會同熱河  
都統臣崇綺附片具陳伏乞

奏  
聖鑒謹

吳仲翔辦理學堂片

光緒七年四月二十三日

再北洋陸續購蚊快鐵甲等船所有管駕大副二副管理輪機  
礮位人員需材甚眾其作養造就之法以練船為基址尤必以學  
堂為根源臣於去年七月奏請

飭派前船政大臣光祿寺卿吳贊誠駐津督辦水師學堂練船事  
宜奉

旨允准在案旋經吳贊誠於天津機器局河東一帶勘定學堂地  
基遴派局員繪圖估料剋日興工一面酌定規條招考學生入堂  
肄業吳贊誠於去冬回南就醫順便赴滬選募學童茲據咨稱舊  
疾增劇不能輕動難期痊愈學堂事務繁重為造就水師人才張  
本關繫海防要務若以病軀從事恐致貽誤懇代奏開去差使另  
派能員接辦以重要公等情前來臣查水師學堂創辦伊始吳贊

誠既因病篤不能前來亟須遴員接替查有二品銜分發補用道吳仲翔久充福建船政提調條理精密任事勤能熟諳製造及駕駛學堂事宜昨經船政大臣黎兆棠奏明給咨赴部引

見道出天津臣稔知其於兵船規制諳練已深擬暫留津差遣派令總辦水師學堂練船事宜以資倚助俟籌辦就緒再由臣奏咨赴部是否有當附片具陳伏乞

聖鑒訓示謹

奏

滿三德請加副將銜片

光緒七年四月二十三日

再據山海關道續昌稟稱稅務司滿三德從前幫同戈登帶兵隨官軍打仗出力蒙

恩賞給二等寶星該稅司屢稱感激圖報本關募設洋鎗隊經該稅司督飭操練自在關當差以來已蒙

天恩賞給三品銜惟西洋風氣以武職爲尤榮可否懇給武官虛銜等情前來臣查山海關稅務司滿三德既曾效力行間又嘗教練鎗隊著有微勞值此時事多艱正宜牢籠逸人以備任使可否仰懇

恩施賞給稅務司滿三德副將銜用示激勵理合附片陳請伏乞聖鑒訓示謹

奏

請緩蘆課奏銷摺  
光緒七年四月二十三日

奏爲援案請緩長蘆本屆正課奏銷以恤商艱恭摺仰祈

聖鑒事竊據長蘆鹽運使如山詳稱蘆商正課例限五月奏銷自

同治十年後商情艱窘節經詳請

奏准緩至十月啟徵茲以例限將屆催令各商完納據通綱商人  
晉有孚等稟稱如果銷路漸暢積困稍舒自應依限輸將何敢瀆  
求展緩無如前數年直豫大災人民流徙未復各岸銷數減少上  
年冬雪未透今春雨澤愆期遂致硝鹽徧地官引益滯標項更絀  
河路亦復淺阻現正竭力設法籌辦春運其去歲未完幣利及帶  
徵正課亦均到限於辦運喫緊之際又須完此數款情形甚屬拮  
据本屆正課奏銷實難依限籌措籲懇援案展緩該運司詳加體  
察委係實情仍議緩至十月啟徵等情具詳請



奏前來臣查長蘆正課前因商情艱窘疊請展緩均經奉

旨允准現值餉需交絀但可依限催納不容稍事稽延實緣災荒  
之後元氣未復又值冬春雪雨稀少地產硝鹽各岸銷數益滯課  
運同時併辦力有難支自應援照歷屆成案籲懇

天恩俯准將光緒七年正課奏銷緩至十月辦理屆時當督飭運  
司認真催徵以濟京奉各餉不致貽誤理合恭摺具

奏伏乞

皇太后

皇上聖鑒訓示謹

奏

營口練軍實成關道摺

光緒七年四月二十七日

奏為營口原設練軍仍應實成山海關道統帶以重口岸而一事權恭摺仰祈

聖鑒事竊據山海關道員昌榮稱營口練軍洋鎗隊五百名原為通商口岸彈壓巡防而設向歸該關道統帶今因照章挑放隊官名缺奉將軍岐元副都統富陞會劄以該軍已有副都統博崇武統帶協領依克津布管帶其公事須由依克津布呈由博崇武核轉該關道既未移交營務又擅自放缺公文內仍有統帶字樣謂不成事現飭依克津布回省將該關道改為管帶仍歸博崇武統帶等因該關道因另派統帶與奏定章程不符且各營管帶應歸統帶官統屬而副都統向無統屬司道體制但既奉會劄請責已將營務移交博崇武接統等情稟報前來臣查同治五年營口添

設練軍洋鎗隊五百名曾經總理各國事務衙門奏稱專爲防護營口之用與奉省地方原有各營絕不相涉應令改設之山海關兵備道統帶調撥歸通商大臣督飭妥辦並謂該處中外交涉事繁有此兵隊既可鎮壓賊匪亦可鉗制外侮且練兵以籌餉爲先該關道管理稅課正可兵餉兼籌事權不致紛歧等因奉

旨允准欽遵在案嗣經三口通商大臣索厚奏加該道海防練兵翼長名目督練官兵並據前關道俊達議定章程二十六條所有營總管帶等官卽以防守尉等充當尋常營務悉由關道主持緊要事件該關道稟請通商大臣將軍核示是此項練軍統帶係奏明隨道缺而設具有深意迄今循辦十餘年並無貽誤上年八月

欽奉

諭旨僅合岐元酌撥旗營練兵派員往營口扼紮交博崇武統帶

岐元已撥給博崇武原練捷勝營旗兵六百名今富陞等遵改定  
章將該關道所統練軍亦交博崇武統帶凡挑放隊官等事皆不  
許該道與聞不特與總理衙門原奏迥不相符且營口爲通商要  
區人情本極浮動關道乃華洋觀瞻所繫向須貴以備兵除此練  
軍五百名又無他兵可調無端撤其統帶必致駭人聽聞遇事掣  
肘呼應不靈實屬有礙大局臣統轄三口商務防務欽遵本年四  
月初八日

諭旨安籌兼顧勢難聽其隨意更變致誤事機該關道續昌明練  
樸誠辦事穩妥到任後察知官兵頗有習氣已設法逐漸整頓並  
刪除浮費樽節餉需尙稱得力所有營口原設練軍洋鎗隊五百  
名應仍責成該關道續昌統帶認真督飭營總管帶各官實力訓  
練務除積習用備緩急老弱弁兵隨時裁汰節出餉項另備籌築

嚴軍之需其尋常營務照章歸該關道經理分報通商大臣將軍衙門遇有緊要事宜稟請臣酌核調度至博崇武應令專統捷勝營旗兵隨時與該關道會商聯絡以符定制擬請

旨敕下岐元轉飭博崇武一體遵照理合恭摺由驛具陳伏乞

皇太后

皇上聖鑒訓示謹

奏

鐵甲籌款分別續造摺

光緒七年四月二十七日

奏爲訂造鋼面鐵甲第一號船按期匯價辦有端緒現擬分別續造豫籌要款恭摺仰祈

聖鑒事竊臣前經疊次奏明西屬出使德國大臣李鳳苞訪查各國船廠酌定新式訂造鐵甲船二隻所需船價計得福建解存上海銀六十萬兩部餉三十萬兩出使經費兩次借撥六十萬兩合共一百五十萬兩所短之數擬再陸續籌撥又以中國洋面將及萬里鐵甲兩隻不敷分布向應續造二號請撥淮南捐項一百萬兩招商局分年拔還官款一百萬兩抵作訂造鐵甲之需均奉旨俞允上年六月十月間准戶部兩次議覆合將淮南捐銀四十萬兩先行撥給應用其餘訂船不敷之數俟酌定船價應分幾次勻付奏報到日再行酌撥總期無誤要需等因奉

旨依議欽此行知遵照各在案臣卽電屬李鳳苞悉心考校迅速  
定議疊據李鳳苞函報在德廠訂造鋼面鐵甲一隻核計初次請  
撥兩船之款本多短絀今因新式價昂不敷之數更鉅臣於上年  
十二月議覆梅啟照海防條陳摺內請

旨飭下總理衙門戶部迅爲籌撥的款迄未奉有覆准明文伏查  
各國鐵艦之式日出日新與其價廉而得已舊之船臨事難操全  
勝不若價昂而求最新之式先聲已足奪人今核李鳳苞所訂德  
國伏耳鏗廠船式爲交戰大洋及守護海口之用兼有水下碰船  
之鐵角喫水深十九尺每一點鐘行十四海里半合中國四十六  
里有奇中腰水纜處鋼面鐵甲厚十四寸前後至首尾皆用鐵甲  
其艙面對角處有兩圓臺亦鋼面鐵甲厚十二寸約十八箇月造  
成李鳳苞復與參贊徐建寅彙集各國新式詳稽博訪去短取長

如轉動之靈捷衝碰之猛利浮力之寬裕噸位之合宜隔塔保護之周密引水導氣之流通下至一板一釘厚薄疏密無不精益求精蓋在中國海面所用之鐵艦斷推此種爲上等矣又據李鳳苞函稱如南北洋合購四船約估價日第一船於光緒六年十一月在德購定勻分四期付價至光緒八年六月交船付訖該船配克鹿卜十二寸口徑後膛礮四尊八九寸口徑後膛礮首尾二尊又分兩期付價加配雷艇電燈連珠礮魚雷裙網等件及驗工查料雇員駛回保險及生徒舵水各薪費約共需八百七十萬馬克卽四十三萬英鎊以每鎊三兩八錢折算合銀一百六十三萬兩有奇其第二船現方屬英法廠主赴德面議但英法工價必較昂如果太昂擬仍在德廠續訂以節糜費籌備亦不可再遲合計第一第二兩船之價需費已在三百二十六萬兩以外至第三第四



兩船將來須赴英法廠另造其價稍浮惟南北洋各備兩艘數已  
至少或可稍爲改易萬不可減小其式大約照式續造兩艘並一  
切隨件薪費約其需九十萬英鎊合計銀數又在三百四十一萬  
兩以外各等語臣查上年六月初五日欽奉

上諭著照所議查照新式訂造鐵甲二隻該督迅卽知照李鳳苞  
速行定議早日造成不可耽延時日至北洋空虛應再定造鐵甲  
二隻俾資分布等因欽此是前後擬訂鐵艦四隻實屬中國必不可  
少之事久在

聖明洞鑒之中惟值此籌款維艱再四籌思必須分年續造以  
紓餉力現計初次擬造二船僅得有著之款一百五十萬兩核以  
李鳳苞所開款目尙短一百七十六萬餘兩除已定一船業飭江  
海關道劉瑞芬於上年九月本年三月兩次電匯英銀二十六萬

鎊約合銀九十七萬餘兩外臣頃又懷遵不可耽延之

諭旨電致李鳳苞屬照現定鋼面鐵甲原式再訂一船洋廠合同一經議定價銀卽須如期分匯未便失信於人使承辦之員稍有掣肘而上海鎊價時有漲落必先儲備實銀俟鎊價稍低或電匯現銀或豫買鎊票分起匯寄乃免喫虧臣擬將准商捐項四十萬兩挪後就前作此次購船之用其應繳六十萬兩依限於五月內可以交清擬請

旨敕下戶部全數撥作船價以符原議並請

敕下兩江督臣轉飭兩淮運司委員解交江海關道收存以便隨時匯寄又屢接四川督臣丁寶楨來函每以東北海防爲念亦勸速購鐵甲練成外海水師去歲俄約未定聞丁寶楨曾奏請籌餉三十萬兩撥解臣處募勇操練防護

京畿事雖未行而其公忠體國之忱令人敬服今購利器以治水師實於中國自強之機關係尤鉅可否

敕下丁寶楨就川鹽官運局分批籌撥船價銀三十萬兩解交北洋助成盛舉以上二款如蒙

准撥約尙短銀四十六萬餘兩容臣再於北洋海防經費及淮軍額餉內先其所急通籌挪湊隨時補苴如此則初造二船可刻期告成矣至續次擬造二船除將鹽捐百萬兩挪用在內僅有招商局繳款百萬兩臣初擬該局每屆可拔還官款三十五萬兩則收至第三屆可以足數嗣據局員唐廷樞等詳報承運本屆各省漕糧應支水腳等項解還官款共僅銀二十九萬餘兩約略計算須至第四屆方能收足百萬之數是一時尙難就緒擬俟二三年後伊犁償款歸清各省財力稍寬屆時再酌度情形奏明請

旨敕下總理衙門戶部籌撥的款定期續造庶水師之規模漸擴  
稍可禦外侮而壯聲援除將李鳳苞寄到第一號鐵甲台同船式  
章程鈔咨總理衙門查核外所有現擬分別續造豫籌要款緣由  
恭摺由驛馳陳伏乞

皇太后

皇上聖鑒訓示謹

奏

商局官款撥購鐵甲請緩撥還片

光緒七年四月二十七日

再欽奉三月十二日

寄諭譚鍾麟奏招商局借撥浙江塘工生息經費銀三十萬兩每年應還銀六萬兩請飭扣還等語著飭招商局於本年承運浙漕腳價項下由浙省糧道扣還本銀六萬兩等因欽此遵查輪船招商局原存各省官本銀一百七十八萬一千五百兩前經奏明於該局承運蘇浙江鄂漕糧應得水腳項下勻分五屆每年撥還一屆銀三十五萬六千三百兩係按該局每年運米六十六萬石而言現在江西停運本屆只承運蘇浙湖止漕米五十餘萬石共得水腳漕平銀二十九萬餘兩按各省原撥官本銀數分攤浙江只應攤還銀四萬九千餘兩並無六萬兩之多且購辦鐵甲船需款緊要臣已於上年六月奏請酌提招商局三屆還款銀一百萬兩

零抵作訂造鐵甲之需奉

旨允准欽遵在案查鐵甲船爲南北洋海防要需關繫軍國大計本應由各省協力籌措因現款難籌不得不酌提招商局還款應急臣業將現訂兩號並擬續訂兩號情形價目另摺詳陳計續訂兩號約需銀三百四十餘萬現僅指招商局還款一百萬兩其餘二百四十餘萬尙無著落若再將此款撥還各省則船價更無所出自應仍遵上年六月

俞旨酌提以符原案現計該局運漕水腳每屆既無三十五萬餘兩約須四屆方能提足百萬所有浙江塘工現需歲修經費應由該撫暫行月籌濟用俟提足船價百萬後再行扣還各省歸款庶海防利器稍資購辦而各省借撥局款亦不至全虛除咨查照外理合附片覆陳伏乞

聖訓示謹  
奏

李文忠公奏稿卷四十